



## **Taglier la ramma da las Bos-cha e preparativs generels per l'Inviern sül territori Cumünel da Segl**

In vista a l'inviern dumandainsa als abitants da la vschinauncha da Segl d'observer las seguintas prescripziuns:

Per eviter impedimaints e prievels pels ütiliseders da vias (servezzan d'inviern, transport d'immundizchas, trafic public, peduns e.o.p.) stu gnir taglieda la bos-cha e la fruschaglia lung las vias uffielas e vias chi vegnan druvedas da veiculs publics i'l territori abito, e que uschè cha la ramma nu taundscha pü aint il spazi da la via (art. 9 da la ledscha da pulizia da Segl ed art. 21 da l'ordinaziun davart las vias dal chantun Grischun). Ad es d'eviter ch'ütiliseders da vias vegnan periclitos tres bös-chs chi cupichan u ramma chi rumpa giò suot la chargia da naiv. L'iglüminaziun da las vias e las teclas da trafic nu suos-chan gnir zugliedas da plauntas. Lung las vias e marchapès ufficiels stögljan gnir alluntanos eir ogets na fixos chi markeschan cunfins da plazzas (recipiains da lain, craps pü pitschens etc.).

Ils proprietaris da terrain cunfinant a la via vegnan dumandos da fer quistas lavuors fin la fin dals 31. october 2024. In cas ch'els nun observan quista prescripziun, s'arsalva la vschinauncha il dret da taglier la ramma a cuost dals proprietaris pertuchos.

La ramma taglieda po gnir deponeda fin il pü tard la fin dals prüm november 2024 tar la piazza da cumpost tar la sarinera Segl al Lej da Silvaplauna (vart dal süd da la sarinera). Scha la quantited surpassa 1.5 m<sup>3</sup>, stu gnir fatta ün'annunzcha tal mneder da l'uffizi da fabrica (079 521 98 92). Ad egen quint po eir gnir incumbenzo il silvicultur da revier (081 826 59 33).

Impü es da pisserer cha'ls sbuchins da las chanels sajan drizzos uschè ch'els nu condüan l'ova sün vias e sendas uffielas düraunt ils mais d'inviern. Quistas lavuors haun da gnir fattas fin la fin dals 31. october 2024. Zieva quista data faro la gruppa da lavur quetaunt a cuost dal proprietari.

Eir las saivs da pascul haun da gnir alluntanadas. Tenor l'art. 95 da la ledscha da fabrica resp. l'art. 17 da l'uorden d'alp e pascul stögljan saivs da pascul gnir alluntanadas respectivmaing missas per terra zieva la perioda da pasculaziun.

L'administraziun cumünela da Segl



GEMEINDE VSCHINAUNCHA  
7514 SILS i.E./SEGL

---

17.09.2024/ SILS i.E./SEGL